

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZENICI
Broj: 43 0 St 260110 25 St
Zenica, 11.05.2026. godine

Općinski sud u Zenici, sutkinja Marina Šapina, u stečajnom postupku nad društvom „TORNADO“ d.o.o. Matuzići b.b., Doboj Jug, odlučujući o prijedlogu privremenog stečajnog upravnika Haris Vehab iz Tešnja, na ročištu održanom dana 11.05.2026. godine, u prisustvu privremenog stečajnog upravitelja Haris Vehab iz Tešnja i punomoćnice predlagatelja Berine Bošnjak, odvjetnice iz Jelaha, donio je sljedeće:

R J E Š E N J E

Pozivaju se povjerioci i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbijedenje troškova stečajnog postupka u iznosu od 5.000,00 KM, na depozitni račun ovog suda broj: 134-010-0000044837 otvoren kod ASA Banke d. d. Sarajevo, te da po izvršenoj uplati predujma sudu dostave uplatnicu, kao dokaz da je uplata izvršena.

Ukoliko u ostavljenom roku povjerioci i zainteresirana lica ne predlože otvaranje stečajnog postupka i ne uplate predujam sud će otvoriti stečajni postupak i odmah zaključiti stečajni postupak nad društvom „TORNADO“ d.o.o. Matuzići b.b., Doboj Jug, MBS: 1-7956.

O b r a z l o ž e n j e

Prijedlogom od 03.05.2025.godine, zastupana po zastupniku po zakonu Kenanu Kesiću, direktoru, odvjetnik pokrenut je stečajni postupak nad navedenim društvom.

Rješenjem ovoga suda br. 43 0 St 260110 25 St od 24.02.2026., pokrenut je prethodni postupak radi utvrđivanja uslova za otvaranje stečajnog postupka nad imovinom stečajnog dužnika .

Na ročištu za ispitivanje uvjeta za otvaranje stečaja održanom dana 11.05.2026. godine, privremeni stečajni upravitelj je izjavio da ostaje kod svog izvještaja od od 27.03.2026. godine i kao i kod posebnog izvještaja o okolnostima iz člana 61. Zakona o stečaju o tome da li je stečajni dužnik blagovremeno pokrenuo stečajni postupak. Navodi da je obišao mjesto koje je u sudskom registru označeno kao sjedište firme – Matuzići bb, Doboj Jug, kojom prilikom sam utvrdio da na poslovnim prostorijama i prostoru ispred poslovnih prostorija nema natpisa koji bi upućivali na to da je na toj adresi sjedište firme i da stečajni dužnik tu obavlja poslovne djelatnosti. Iz razgovora sa direktorom društva i na osnovu dokumentacije koja mi je bila na raspolaganju utvrdio sam da je društvo osnovano 1999. godine, da je pretežna djelatnost društva je bila trgovina na veliko raznovrsnom robom, da je poslovanje društva u potpunosti obustavljeno, a posljednje poslovne aktivnosti društvo je ostvarilo u 2005. godini, da društvo ima ukupno 4 transakcijska računa (3 u KM i 1 devizni) koji su svi blokirani radi nemogućnosti društva da izvršava svoje dospjele novčane obaveze, da društvo ima dug po osnovu javnih prihoda, da direktor društva nije u radnom odnosu i društvo nema ni jednog zaposlenog radnika, da je sačinjen finansijski izvještaj za period od 01.01.2025.godine do 31.12.2025.godine, a u sudskom spisu se nalazi finansijski izvještaj za period od 01.01.2024.godine do 31.12.2024.godine, da društvo nema vlastito knjigovodstvo, a nema ni zaključen ugovor sa knjigovodstvenom agencijom za obavljanje računovodstvenih poslova, te da osim poslovne dokumentacije koja je dostavljena sudu uz prijedlog za otvaranje stečajnog postupka, društvo djelimično posjeduje poslovnu dokumentaciju o poslovanju firme u proteklom periodu te dokumentaciju o osnivanju firme.

Analizom bilansa uspjeha za period od 01.01.2025.godine do 31.12.2025.godine utvrđeno je da u navedenom periodu, društvo nije ostvarilo nikakve poslovne prihode, da u navedenom periodu društvo nije imalo ni rashoda, da je za isti period dobit društva iznosila 0,00 KM, te da za isti period gubitak društva iznosi 0,00KM. Iz navedenog proističe da u periodu od 01.01.2025.godine do 31.12.2025.godine, društvo nije

ostvarilo ni dobit ni gubitak tako da je na kraju izvještajnog perioda ostvarilo ukupan rezultat od 0,00 KM. U prethodnim periodima, od 01.01.2024.godine do 31.12.2024.godine i od 01.01.2023.godine do 31.12.2023.godine društvo nije ostvarilo nikakve prihode, nije imalo ni rashoda, tako da je društvo na kraju tog perioda ostvarilo ukupan rezultat od 0,00 KM.

Prema bilansu stanja na dan 31.12.2025.godine iskazana je ukupna aktiva ili imovina društva u iznosu od 125.038,00 KM, a analizom bilansa stanja utvrđeno je da kratkoročna imovina društva iznosi 125.038,00 KM i odnosi se na zalihe odnosno date avanse u iznosu od 124.176,00 KM i ostalu imovinu i potraživanja uključujući razgraničenja u iznosu od 862,00 KM. Društvo ima iskazane zalihe odnosno date avanse u iznosu od 124.176,00 KM. Društvo nema sirovina, materijala, roba, gotovih proizvoda, niti ima potraživanja od kupaca. Društvo nema dugoročne imovine, nema postrojenja, opreme, namještaja, transportnih sredstava, nematerijalne imovine, niti ostale dugoročne imovine. Dobit društva iznosi 91.710,00 KM i u potpunosti se odnosi na akumuliranu neraspoređenu dobit iz ranijeg perioda, a nema dobiti tekućeg perioda. Gubitak u poslovanju iznosi 800.396,00 KM i odnosi se u potpunosti na akumulirani nepokriveni gubitak iz ranijeg perioda, a nema gubitka tekućeg perioda.

Vlasnički kapital je iskazan u iznosu od 6.240,00 KM, a ukupan ukupan kapital društva iznosi -702.446,00 KM, što znači da je društvo ostvarilo gubitak iznad visine kapitala u iznosu od 702.446,00 KM, a ta vrijednost je bila ista i na kraju 2024. godine te na kraju 2023.godine.

Prema bilansu stanja društvo ima iskazanu imovinu u ukupnom iznosu od 125.038,00 KM koja se u potpunosti sastoji od kratkoročne imovine (zalihe odnosno dati avansi u iznosu od 124.176,00 KM i ostala imovina i potraživanja uključujući razgraničenja u iznosu od 862,00 KM). Međutim, faktičko stanje je takvo da ova imovina ne postoji.

Prema Bilansu stanja iskazana je ukupna pasiva ili obaveze društva u iznosu od 827.484,00 koje se u potpunosti odnose na kratkoročne obaveze, od čega su obaveze prema dobavljačima u iznosu od 452.231,00 KM, obaveze po uzetim kreditima u iznosu od 160.233,00 KM i ostale obaveze uključujući i razgraničenja u iznosu od 215.020,00 KM.

Prema Uvjerenju Porezne uprave F BiH, Porezna ispostava Tešanj br. 13-4/12-12-5-645/26 od 10.03.2026.godine, društvo na dan 10.03.2026. godine ima iskazan javni dug po osnovu neplaćenih javnih prihoda u iznosu od 178.656,39 KM. Društvo nema iskazanih dugoročnih finansijskih obaveza. Ovakve obaveze su bile iskazane i na kraju 2024. godine te na kraju 2023.godine.

Prema Izvještaju Centralne banke BiH o računima poslovnog subjekta na dan 10.03.2026.godine, utvrdio sam da "TORNADO" d.o.o. ima 4 otvorena računa (3 u KM i 1 devizni) i to: KM račun br. 338550220124988 u Unicredit bank d.d. koji je ujedno i glavni račun koji je blokiran dana 05.07.2004.godine i devizni račun br. 3385504800178948 koji je blokiran dana 30.09.2018.godine, KM račun br. 1346651007105930 u ASA banci d.d. koji je blokiran dana 01.12.2021.godine, i KM račun br. 1610400000390028 u Raiffeisen banci d.d. koji je blokiran dana 03.06.2005.godine. Prema Potvrdi ASA banke d.d. br. 3240-24-3151/2026 od 17.03.2026.godine račun društva je blokiran, sa stanjem 0,00 KM. Prema Potvrdi Raiffeisen bank d.d. br. SD1803-3/2026 od 18.03.2026.godine, račun društva je blokiran, sa stanjem 0,00 KM. Prema pregledu naloga prinudne naplate za račun u Raiffeisen bank d.d. na dan 18.03.2026.godine, na računu društva u ovoj banci ima ukupno 8 blokada, od kojih su 3 od Porezne uprave KPU Zenica, na ukupan iznos od 118.635,54 KM, 2 su od povjerioca MHM komerc d.o.o. na ukupan iznos od 84.505,20 KM, 2 su za sudske takse u ukupnom iznosu od 438,40 KM, i jedna je za neplaćenu novčanu kaznu u iznosu od 190,00 KM. Prema Potvrdi UniCredit bank d.d. br. TE10-18-3-26-853 od 18.03.2026.godine društvo ima otvoren glavni račun KM sa stanjem 1,60 KM i devizni račun sa stanjem 0,00 koji su blokirani od januara 2024.godine. Prema pregledu naloga prinudne naplate za račune u Unicredit banci u periodu od 01.01.2001.godine do 18.03.2026.godine, na računima društva u ovoj banci ima ukupno 10 blokada na ukupan iznos od 187.977,65 KM od čega su 4 poreska/carinska naloga na ukupan iznos od 145.659,05 KM i 6 naloga po sudskim rješenjima na ukupan iznos od 42.318,60 KM.

Stečajni dužnik je platežno nesposoban, jer duže od 60 dana neprekidno ne izmiruje svoje dospjele novčane obaveze, nije u stanju da izvršava svoje dospjele i potraživane obaveze plaćanja, a svi računi stečajnog dužnika su blokirani duže od 60 dana neprekidno, zbog čega su u smislu člana 6. Zakona o stečaju nastupili

razlozi za otvaranje stečajnog postupka nad stečajnim dužnikom.

Platežna nesposobnost stečajnog dužnika je nastupila najkasnije dana 01.12.2021.godine. jer stečajni dužnik u periodu od 01.12.2021.godine kao dana posljednje blokade računa pa do dana podnošenja prijedloga za otvaranje stečaja, što je period od preko 60 dana neprekidno, ne izmiruje svoje dospjele novčane obaveze.

Društvo ne može ni djelimično niti u cijelosti izmiriti potraživanja povjerilaca. Stečajni dužnik odnosno organ ovlašten za zastupanje stečajnog dužnika nije podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

U finansijskom izvještaju društvo ima iskazanu imovinu u ukupnom iznosu od 125.038,00 KM koja se u potpunosti sastoji od kratkoročne imovine (zalihe odnosno dati avansi u iznosu od 124.176,00 KM i ostala imovina i potraživanja uključujući razgraničenja u iznosu od 862,00 KM). Međutim, prema usmenom izjašnjenju predstavnika knjigovodstvenog servisa koji je sačinio finansijske izvještaje, faktičko stanje je takvo da ova imovina ne postoji jer ovi avansi potiču iz perioda prije blokade bankovnih računa, dati su dobavljačima za robu koja je kasnije isporučena i prodana, ali nisu rasknjiženi fakturama dobavljača.

Ni na jednom od računa u bankama, društvo nema raspoloživih novčanih sredstava.

Iz finansijskog izvještaja proističe da društvo ima iskazanu imovinu, međutim faktičko stanje ukazuje na to da ova imovina ne postoji. Društvo nema iskazanih potraživanja prema kupcima.

Društvo nema pokretne ili nepokretne imovine iz koje bi se mogla formirati stečajna masa ni za podmirenje troškova stečajnog postupka, a dokazi za to su priloženi uz izvještaj.

Stečajni dužnik ne obavlja nikakvu poslovnu djelatnost, nema poslovnih prostorija, nema ni jednog zaposlenog, ima dospjele obaveze prema dobavljačima, ima dospjele obaveze prema javnim prihodima zbog čega smatram da ne postoje nikavi izgledi da se poslovanje stečajnog dužnika u cjelini ili djelimično nastavi u toku prethodnog postupka.

Smatra da postoje razlozi za otvaranje stečajnog postupka, te predlaže da sud u skladu sa članom 102. st. 7. Zakona o stečaju javnim pozivom pozove povjerioce i zainteresovana lica da u roku od 30 dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka u iznosu od 5.000,00 KM, te da ukoliko niko u ostavljenom roku ne predujmi određeni iznos, donese rješenje o otvaranju i zaključenju stečajnog postupka nad ovim društvom, te po pravomoćnosti isto briše iz sudskog registra.

Punomoćnica predlagatelja izjavljuje da ostaje kod prijedloga za otvaranje stečaja, da nema primjedbi ni pitanja na Izvještaj privremenog stečajnog upravitelja, te da je suglasana sa prijedlogom privremenog stečajnog upravitelja.

Kako stečajni dužnik ima obaveze, a nema imovine, pa ni za troškove stečajnog postupka, to je sud primjenom odredbe člana 102 st. 7. Zakona o stečaju („Službene novine F BiH”, broj: 53/21) pozvao povjerioce i zainteresirana lica da predlože otvaranje stečajnog postupka i uplate predujam za obezbijedenje troškova stečajnog postupka. Visina troškova srazmjerno je određena visini troškova koji se očekuju, a koji su potrebni za otvaranje i vođenje stečajnog postupku, a koje je predložio privremeni stečajni upravitelj.

Slijedom navedenog odlučeno je kao u izreci ovog rješenja primjenom odredbe čl. 102 st. 7 Zakona o stečaju (Sl. novine F BiH br. 53/21), a ovim rješenjem povjerioci i zainteresirana lica su upozorena na posljedice propuštanja postupanja po pozivu ovog suda, propisane čl. 102 st. 8 Zakona o stečaju.

POUKA O PRAVNOM LIJEKU:
Protiv ovog rješenja nije
dozvoljena žalba.

Sutkinja:
Marina Šapina